

mei. Jeu drovel il cor dalla schemia". Nies crocodil ei vegnius uss en grondas difficultads. Co dueva el saver purtar il cor dalla schemia al capocrocodil? Gia da bunura eis el semess sin via tier la plonta da mango. Fertion ch'el era sin viadi ha el fatg plans. La schemia ha secapescha giu plascher da veser siu amitg." Beinvegni miu car, jeu hai plascher da tia viseta". Il crocodil rispunda: "Ti schemia eis stada aschi buna cun mei il davos temps. Ed era a tschels crocodils da mia populaziun has ti regalau fretgs aschi grondius. Per cumpensar quei, less jeu envidar tei da vegnir tier nus vi da l'otra vart dil flum. Ti dueis esser nies hosp. Miu capocrocodil havess grond plascher d'emprender d'enconuscher tei." *Interrumpa, cumpareglia la descripziun ella successiun.*

## 2. Part

"Quei ei bi da tei, d'envidar mei tier tei", ha la schemia detg. "Jeu selegrel d'emprender d'enconuscher tiu capocrocodil e tia populaziun. Mo co pomai duei jeu vegnir vi tier vus? Jeu sai gie buca senudar." "Quei ei negin problem, cara schemia. Ti sesas semplamein sin miu dies ed jeu transporteschel tei vi da l'otra vart dil flum," di il crocodil. La schemia ei beada e va d'accord.

Ella seglia a dies al crocodil. Amiez il flum sesfundra il crocodil pli e pli fetg. La schemia cloma" he, crocodil, jeu vegn bletscha. Ti astgas buc sesfundrar pli fetg". Il crocodil fa buc feda e sfundra aunc dapli. Per ussa senta la schemia che zatgei ei buc en uorden. Ed ella cloma: "Tgei has ti el senn da far? Jeu vegnel a negar." Il crocodil rispunda: "Mia cara amitga, jeu vi dir a ti la verdad. Miu capocrocodil vul ch'jeu porti ad el tiu cor. Pertgei el vul haver tut ils mangos mo per el." La schemia ei sesnuida. Plein pitgiras ha ella ponderau co ella savessi sespindrar. La finala ha ella detg aschi ruasseivel sco pusseivel. "Daco has ti buca detg quei a mi direct? Lu havess jeu priu el cun mei." "Tgei havessas ti priu cun tei?" damonda il crocodil tut surstaus. "Secapescha miu cor", di la schemia. "Tgei? Ti has gnanc priu cun tei tiu cor?" damonda il crocodil tut surstaus. "Na, quel lasch jeu adina pender sin la plonta da mango. Quel drov jeu buc per far in'excursiun. Neu, nus semenein immediat e mein per el" di la schemia. Il crocodil ei tut perplex. El semeina e senoda beinspert a riva. La schemia seglia giu dil crocodil. Beinspert eis ella revida sin la plonta da mango e clamau. "Sas ti tapalori atgnamain buc, che las schemias han lur cor el pèz sco tut ils

auters? Has ti veramein cartiu ch'jeu accumpogni tei tier tia populaziun per ir alla mort? Tuorna anavos tier ils tes. Nossa amicezia ei a fin inaga e per adina. Plein turpetg ei il crocodil senudaus anavos. El ei sefatgs en ch'el haveva piars siu meglier amitg. Perquei ha el spons ina grossa larma da crocodil. La schemia perencunter ha ris da schluppar e fiers mangos marschs suenter al crocodil.

*Schumbrada tam, tam...*

Tschels animals han udiu il rir dalla schemia. Tuts ein serimnai: il liun, igl elefant, la zebra, la siarp, la giraffa e tut ils auters.

*Las gruppas d'affons fan puspei ils moviments e las ramurs.*

La schemia ha detg il verset magic:

*Ils affons rispundan:*

*"Naraboro tandaboro, Muganga mapenda, Koda kigi kanga".*

Duront ch'ils animals han partgiu ils fretgs, ha la schemia raquintau ad els la historia dil crocodil e tuts han ris da cor.

*Martin Moffor/Siegfried Arends  
Translaziun: Rita Killias-Cantieni*

